



*Nunat Avannarliit Killiit Siunnersuisoqatigiiffiata kaammattuutityut aalajangersagaanik nr. 4/2022-imi Inatsisartut ilaliinissaannik siunnersuut: Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut nunani avannarlerni killerni naligiissitaanissamut naalakkersuisut 2023-mi ataatsimeeqatigiissinneqarnissaat kaammattuutigaa. Tamatuma siunertarineqassaaq nunani avannarlerni killerni naligiissitaanermut naalakkersuisut Naligiissitaaneq eqqarsaatigalugut 2019-imiit 2022-mut nunani avannarlerni suleqatigiinnissamut pilersaarut, Nunani avannarlerni LGBTI-t naligiimmik pisinnaatitaaffeqarnerat, pineqartussaanerat periarfissaqartinneqarnissaallu pillugit tapertalerlugu 31. decemner 2024-ip tungaanut ingerlaqqittussatut nunani avannarlerni naligiissitaanermut ministerit 6. september 2011-mi aalajangiffigisaat, eqqarsaatigalugu misilittakkanik parlaasseqatigiinnissaat. Taamatuttaa q kaammattuutigineqarpoq nunani avannarlerni killerni naligiissitaanermut naalakkersuisut naligiissitaaneq eqqarsaatigalugu nunani avannarlerni killerni ajornartorsiutit suussusersiniassagaat taakkulu eqqarsaatigalugit suliniutit ataqatigiittut eqqartorlugit. Ilanngullugu kaammattuutigineqarpit arnat angutillu naaligiissitaanissaat eqqarsaatigalugit Naalagaaffiit Peqatigiit nunarsuarmioqatigiinnut anguniagassiaat nunat avannarliit killiit naligiissitaanermut naalakkersuisut suleqatigiinnerminni innersuussutigissagaat.*

*(Aallartitat siulittaasuut Kim Kielsen)*

*(Siullermeernera)*

Nunat avannarliit killiisa siunnersuisooqatigiiffiata siunnersuuteqarneranut qujavugut.

Suiaassuseq kinguaassiuutitigullu apeqqutaatinnagu assigiimmik periarfissaqarnissaq naligiissitaanissarlu immikkut sammineqarnissaa Demokraatinut pingartuuvoq.

Immitsinnut najornitsinni sutigut tamatigut ataqqeqatigiillutalu iluamik pisariaqarpugut, aamma inoqatigut suaassutsikkut kinguaassiuutitigullu qanorluunniit inissisimagaluarutta.

Matumani nunat akornanni misilittakkat avitseqatigiiffiginissai isumatusaarnerussaaq. Taamaattumillu nunat avannarliit suleqatigisagut Island Savalimmiullu oqaloqatiginissai periarfissaalluarpoq, nunatummi assigiiffeqartaratta. Unammilligassat assigiinnersut imaluunniit assigiinngiaarnersut, soqutiginassaarlu Islandimi Savalimmiunilu iliuusissat suliniutillu suut atorneqarsinnaanersut qiviassallugit.

Taamaattorli teknologi atorlugu periarfissat nunat avannarliit naligiissitaanermut ministerii ataatsimeeqatiginissaannut nittartakkatigut periarfissaq atorneqarnissaat Demokraatiniit kaammattuutigerusupparput, naapilluni ataatsimeeqateqaqqissaartariaqarnermut tunngavilersuutit pitsaasut takusinnaannginnatsigit. Nittartakkatigullu ataatsimiinnerit maanna Naalakkersuisuutitaqartunit angalanikkut aningaasartuutit annertungaartunut millisaataasinnaapput.

Taamatut tunngavilersuuteqarluta siunnersuut akuerineqarnissaa innersuussutigaarput.